

Problema di medicamento ta hiba nos den "Drama"

Na Varios ocasion, den ultimo aña pa aña y mey, mi a publica di e "desaster" cu nos ta bay haya nos mes aden cu asunto di AZV, e actitud irresponsable di gobierno y problemanan cu lo bin haya. Tin cu a hari, otronan a rabia masha hopi pasobra mi a publica e "verdadnan" ey, y awe nos ta mira atrobe cu tur ta birando realidad.. Un injusticia grandi ta ser cometi contra nos hendenan y tin varios cu mester wordo menciona.

E BOTICANAN EN GENERAL

Cu excepcion di Botica San Nicolas y Savaneta, mayoria di boticanan a dicidi di no duna remedi mas na patientnan cu tin carchi di AZV. Pero si mira e problema actual, e crisis actual, bon, ta esnan cu tin carchi ta e victimanan.

No ta e pensionado, o patient cu carchi di AZV a pidi pa wordo hinca den AZV.

E patientnan aki a paga 25 0 30 aña tur luna for di nan salario pa awor tin derecho pa ricibi nan remedi cu e carchi di AZV GRATIS menos 10 %.

Ta nan a bira victima di AZV, algo cu mi a señala un aña pasa y mas cu un aña pasa caba y awe nos ta den e crisis.

Nan tabata e "Proefkonijn" pa mira con AZV lo anda siendo cu tur preparacion di tanto aña tabata den sistema di "Pan pidi funchi hala". Boticanan y hospital (cu awor tambe ta nenga di acepta carchi di AZV) no ta mescos cu tur otro negoshi normal cu ta vende material.

Nan ta vende remedi pa "salud di hende".

Aki ta unda e peliger ta sinta, pasobra awor tin hopi patient cu ta patient di corazon o cu presion halto o diabetico, cu tin remedi caro di mas di 100 florin cu nan no por paga CASH" cu ta wordo pidi di nan.

Nan tambe tin nan sentimentonan y no ta bay mendiga na botica dilanti otro hende pa "por fabor, yuda nos y haci excepcin pa nos."

No, nan tin nan dignidad y orguyo y na lugar di esey ta prefera di no bay busca e remedi pasobra nan "no tin placa y no ta usa e remedi mas" of nan ta usa e remedi menos, por ehemplo 1 vez na lugar di 3 vez pa dia.

Solamente 1 vez pa dia ta perhudica nan salud y trece nan den peliger grandi di haya atake di corazon o bira agresivo pa motibo di e presion o sucu cu ta subi sky high o bay for di balance pa falta di e remedi cu no ta ser usa manera mester ta.

Hopi patient a bira mas malo caba y ta core peliger grandi.

Hopi patient a bira peor pasobra nan no por bay cumpra nan remedi.

TIN CAMINDA DI CANA PA HACI DENUNCIA

Tur e instancianan involvi ta responsable si algo pasa y ta tur mester wordo denuncia via corte pa e irresponsabilidad aki, hungando cu bida di hende.

Hasta si hospital tripi di NO ACEPTA e patientnan aki, ta suficiente pa denuncia hospital hudicialmente y hasta manda informacion ROND MUNDO riba e TRAPAMIENTO DI DERECHO HUMANO cu ta tumando lugar na Aruba y pa mundo mira con alarmante e situacion ta, y cu a bini tambe door di MAL GOBERNACION.

No por ta asina cu ministro di finanzas ta retira, ta bisa cu no tin placa

y cu e pueblo tin cu acepta tur esaki cu boca cera.

UNDA SINDICATONAN A KEDA DEN E CASO AKI

Straño ta tambe cu den e crisis aki NINGUN sindicato a tripi di muestra nan cara verdadero di representante di trahadornan.

E sindicato di maestronan di school por ehemplo ta yen di pensionado cu ta pasando den e caminda di cruz aki.

Sindiato di empleadonan publico y sindicato di sector priva y otronan mester por pone placa hunto si nan mes no tin placa y tanta caso na nomber di nan miembronan pensionado y busca pa habri caminda pa nos hendenan haya nan remedi.

Awor si no ta tende di marcha di protesta organiza pa sindicatonan.

Mester por yega na haya juez pa dicta sentencia contra gobierno, AZV, Boticanan y hospital pa carchinan di AZV wordo acepta.

Si bisa juez cu NO TIN PLACA anto juez mester laga PONE BESLAG riba gobierno su propiedadnan, bende nan pa nos hendenan por haya nan DERECHO.

E AZV den cual nan a wordo hinca involuntariamente ta un derecho cu nan adqueri y cu MESTER WORDO HONRA Y RESPETA.

E boticanan ta hunga cu bida di hende.

E grupo chiquito di nos grandinan cu ta usa carchi di AZV ta un grupo minoritario di pueblo y Boticanan sigur no ta wordo perhudica pa un grupo asina.

Tur otro patient si ta paga cash, pues di con no tin placa pa encarga remedi?

Si gobierno y AZV ta debe boticanan tanto placa, cu tur nan-razon boticanan por tuma accion contra gobierno.

HOSPITAL Y PENSIOENFONDS TAMBE

Na Aruba ta un hospital tin y e hospital aki ta pa yuda patientnan y no pa cera porta pa NINGUN patient ni pa AZV-Patient cu a paga henter su bida.

Si gobierno debe hospital tambe, anto hospital ta acepta e patient y ta demanda gobierno o AZV pa su placa.

Nos no ta biba den pais di tercer mundo unda tur sorto di wega ta tuma lugar y unda tin labamento di man manera Pontio Pilato.

Mientras cu carchi di AZV "no ta wordo acepta" ta inhusto pa Pensioenfondos kita tur luna e ziektekosten manera custumber. Nan tambe mester ta responsabel y razonabel di warda cu esey te ora cu esaki ta regla.

Si kita ziektekosten tur luna, kico ta resta anto pa paga remedi?

Pensioenfondos tambe tin caminda pa cana pa segura pensioen di tur hende.

Si gobierno a usa e placa di Pensioenfondos, locual ta hopi miyon di florin anto Pensioenfondos mester stop di entrega mas placa di pensionadonan na gobierno te ora cu gobierno cuminsa paga e debe back.

E cos aki ta bay escala, y mi ta mira cu ta hopi Arubiano malcontento un dia lo tuma caya y esaki mester para prome cu "e baca hoga" y nos haya nos mes den un drama.

Juby

TENNIS LES PARIBA DI BRUG

Luga nan cu tin habri:

- Diamars 3 pa 4or, 3 luga pa mucha di 6-9 aña.
- Diamars 5 pa 6or, 3 luga pa mucha homber 13-16 aña.
- Diamars 7 pa 8or, 2 luga pa mucha muhe 14 pa 18 aña.
- Diaranzon 3 pa 4or, 5 luga pa mucha 6-9 aña.
- Diajuebs 3:30 pa 4:30, 4 luga pa mucha 8-13 aña
- Diajuebs 4:30 pa 5:30, 6 luga pa mucha 10-14 aña
- Diajuebs 5:30 pa 6:30, 6 luga pa mucha 14- 18 aña
- Diasabra 9:30 pa 10:30 mainta, 3 luga 5 - 8 aña

Inscribi e siman aki y haya bo promer less gratis.

For di Afl. 50 pa luna, lugar nan ta pa principiante.

Estudiante avansa y adulto, "please call".

QUEDA PENDIENTE PA NOS TENNIS CAMP DI ANA

Duna bo jiu y bo mes e oportunidad aki !!

Informacion: 844658 / 841064 / 932744

ARUPRO TENNIS SCHOOL

PARTICIPACION

En relacion cu Mundial di Futbol Dr. T.H.K. Lin lo concentra su horarionan di consulto di 8-12 di mainta casonan urgente fuera di oranan aki por localize via
Tel: 872694